



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 594, Datë 07.02.2019

“Mbi zbatimin e rekomandimeve të dhëna për Bankën e Shqipërisë me Vendimin nr. 580 datë 17.01.2019 të Komisionit të Konkurrencës”

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 07.02.2019, shqyrtoi çështjen me:

Objekti: Vlerësimi i shkresës nr. 925, datë 29.01.2019 të Bankës së Shqipërisë, Departamenti i Mbikëqyrjes, në lidhje me Vendimin nr. 580 datë 17.01.2019 të Komisionit të Konkurrencës.

Baza Ligjore: Neni 24, germa d) dhe f), neni 70 i ligji nr. 9121, datë 28.07.2003 “Për Mbrojtjen e Konkurrencës”, i ndryshuar.

Komisioni i Konkurrencës, pas shqyrtimit të informacionit të Sekretarit të Përgjithshëm në lidhje me shkresën nr. 925 datë 29.01.2019 “Mbi Vendimin nr. 580 datë 17.01.2019 të Komisionit të Konkurrencës”, të Bankës së Shqipërisë, Departamenti i Mbikëqyrjes, për rekomandimet e dhëna nga Komisioni i Konkurrencës me Vendimin nr. 580 datë 17.01.2019 “Mbi përfitim të kontrollit nëpërmjet shitblerjes së 98,83% të aksioneve të Tirana Bank SHA nga Piraeus Bank SA tek Balfin SHPK dhe Komercijalna Banka Ad Skopje”,

VËREN SE :

Komisioni i Konkurrencës, në pikën 2 të Vendimit nr. 580 datë 17.01.2019 “Mbi përfitim të kontrollit nëpërmjet shitblerjes së 98,83% të aksioneve të Tirana Bank SHA nga Piraeus Bank SA tek Balfin SHPK dhe Komercijalna Banka Ad Skopje”, vendosi t’i rekomandojë Bankën e Shqipërisë që:

- Për çështje të stabilitetit financiar, të gjitha shoqëritë tregtare të kontrolluara nga Balfin SHPK, që zotërojnë pozitë dominuese ose që do të marrin në të ardhmen këtë

pozitë, duhet të monitorohen dhe të trajtohen si aktivitete të lidhura me sistemin bankar, pavarësisht objektit të veprimtarisë së tyre.

- b. Të parashtrijë përpara Autoritetit të Konkurrencës çdo ndryshim në strukturën e shoqërive të monitoruara, ku mund të krijohet apo forcohet pozita e dominuese në treg.

Banka e Shqipërisë, nëpërmjet drejtorit të Departamentit të Mbikëqyrjes i është drejtuar Kryetares së Komisionit të Konkurrencës, nëpërmjet shkresës nr. 925 datë 29.01.2019 “Mbi Vendimin nr. 580 datë 17.01.2019 të Komisionit të Konkurrencës”, ku shprehet në lidhje me rekomandimet e dhëna si më poshtë vijon:

- Banka e Shqipërisë në kuadër të mbikëqyrjes së veprimtarisë bankarë, për rekomandimet e mësipërme, vlerëson se kryerja e veprimeve të përcaktuara në rekomandimet e AK nuk është objekt i veprimtarisë së BSH dhe banka nuk disponon instrumentet në funksion të zbatimit të rekomandimeve.
- Në lidhje me pikën a) të rekomandimit, BSH vlerëson se e ka të pamundur të identifikojë dhe vlerësojë shoqëritë tregtare me qëllim konstatimin e pozitës dominuese të tyre në treg dhe gjithashtu BSH është e paqartë për konceptin “aktivitete të lidhura me sistemin bankar”, në kushtet kur ligji për bankat përmban të tjera përcaktime.
- Në lidhje me rekomandimin b), BSH vlerëson se ajo nuk mbikëqyr dhe as monitoron shoqëritë tregtare të cilat ushtrojnë veprimtari tregtare, pavarësisht lidhjes që ato mund të kenë me shoqëritë tregtare të licencuar për ushtrimin e veprimtarive bankare.
- Gjithashtu BSH ka bërë vlerësimin e saj në lidhje me pikën 1, germa c) të dispozitivit të Vendimit, pikë kjo e cila nuk lidhet me BSH por i është adresuar Tirana Bank SHA.

Komisioni i Konkurrencës në zbatim të neneve 19, 21 dhe 24 të ligjit nr. 9121/2003 “Për mbrojtjen e konkurrencës”, i ndryshuar, me Vendimin nr. 580, datë 17.01.2019 “Mbi përfundimin e kontrollit nëpërmjet shitblerjes së 98,83% të aksioneve të Tirana Bank SHA nga Piraeus Bank SA tek Balfin SHPK dhe Komercijalna Banka Ad Skopje”, i është drejtuar Bankës së Shqipërisë me cilësinë e një organi kolegjal dhe vendimmarrës, që zgjidhet nga Kuvendi i Shqipërisë.

Në zbatim të nenit 70 të ligjit nr. 9121/2003, autoritetet e administratës qendrore dhe vendore, entet dhe institucionet e tjera rregullatorë, gjatë kryerjes së detyrave për rregullimin e veprimtarisë ekonomike në territorin e Republikës së Shqipërisë, janë të detyruara të zbatojnë dispozitat e këtij ligji dhe të sigurojnë një konkurrencë të ndershme dhe efektive. Autoriteti i Konkurrencës, për arsye të interesit të përgjithshëm, vlerëson në veçanti, barrierat rregulluese të konkurrencës, të përfshira në rregullimin ekonomik dhe administrativ dhe në këto raste bën rekomandimet përkatëse. Autoriteti i Konkurrencës, për zbatimin e këtij ligji, në sektorët e rregulluar, bashkëpunon me entet dhe institucionet e tjera rregullatorë.

Në zbatim të rregullimeve ligjore të parashikuar shprehimisht në nenet 12, germa a) dhe 43, germa c) të ligjit nr. 8269, datë 23.12.1997 "Për Bankën e Shqipërisë", i ndryshuar,

autoriteti më i lartë drejtues i Bankës së Shqipërisë është Këshilli Mbikëqyrës, i cili ka të drejtë të miratojë transaksionin e kryer dhe të vlerësojë vendimmarrjen e Komisionit të Konkurrencës, dhe jo një Departament, nga pikëpamja hierarkike institucionale.

Nga ana tjetër, transaksioni i kryer “Mbi përftimin e kontrollit nëpërmjet shitblerjes së 98,83% të aksioneve të Tirana Bank SHA nga Piraeus Bank SA tek Balfin SHPK dhe Komercijalna Banka Ad Skopje”, për çështje të stabilitetit financiar ku Tirana Bank SHA do të zotërohet në 88,83% të aksioneve nga Balfin SHPK, dikton nevojën e mbikëqyrjes së të gjitha shoqërive tregtare të kontrolluara nga Balfin SHPK, të cilat zotërojnë pozitë dominuese ose që do të marrin në të ardhmen këtë pozitë, në kontekstin që ato duhet të monitorohen dhe të trajtohen si aktivitete të lidhura me sistemin bankar, pavarësisht objektit të veprimtarisë së tyre, evidentuar qartë në pjesën arsyetuese të vendimit nr.580, datë 17.01.2019 të Komisionit të Konkurrencës, dhënë me kushte dhe detyrime.

Në reference të dispozitave ligjore, neneve 12, 42 dhe 43 të ligjit nr. 8269, datë 23.12.1997 "Për Bankën e Shqipërisë", i ndryshuar, vlerësojmë se Banka e Shqipërisë si rregullatori i sistemit bankar, i cili mbikëqyr veprimtarinë e bankave të nivelit të dytë, nxjerr akte ligjore dhe nënligjore për rregullimin e këtij tregu, ka të gjitha instrumentet e nevojshëm për të zbatuar dy rekomandimet e dhëna nga Komisioni i Konkurrencës në Vendimin nr.580, datë 17.01.2019.

PËR KËTO ARSYE:

Komisioni i Konkurrencës, në bazë të nenit 24, shkronja d dhe f dhe nenit 70 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar,

VENDOSI:

1. Ti rekomandojë Këshillit Mbikëqyrës të Bankës së Shqipërisë, zbatimin e Vendimit nr. 580 datë 17.01.2019 “Mbi përftimin e kontrollit nëpërmjet shitblerjes së 98,83% të aksioneve të Tirana Bank SHA nga Piraeus Bank SA tek Balfin SHPK dhe Komercijalna Banka Ad Skopje”, përkatësisht në pikën 2, germa a) dhe b) e dispozitivit të këtij vendimi, të dhënë me kushte dhe detyrime.
2. Ngarkohet Sekretari i Përgjithshëm për njoftimin e palëve dhe dërgimin e vendimit.

Ky vendim hyn në fuqi menjëherë.

KOMISIONI I KONKURRENCËS